

Икки ракатда ўн икки пора Қуръон ўқиган қори



14:30 / 12.05.2022 9121

Машҳур Қуръон ҳофизи Сайдуллоҳ қори мулла Ортиқ қори ўғли 1900 йилда Наманган шаҳри, Сардоба даҳаси, (ҳозирги Марғилон кўчаси)да маърифатли хонадонда дунёга келди. Отаси мулла Ортиқ қори замонасининг машҳур мударриси ва Қуръон ҳофизи бўлган.

Маълумотларга кўра, Ортиқ қорининг 8 нафар ўғил, 2 нафар қиз фарзандлари бўлган. Барча фарзандлари илм аҳли, Қуръон аҳли бўлишган. Шуларнинг ичида энг кенжа фарзанд Сайдуллоҳ қори бўлган эканлар.

1901 йили мулла Ортиқ қори оламдан ўтади. Барча оила ташвиши аёли Пошшахон ойим зиммасида қолади. Онаси ўғли Сайдуллоҳни ўқимишли, зиёли инсон бўлиб, камол топиши учун куну тун меҳнат қилиб, унинг таълими, тарбиясига жиддий аҳамият беради. Сайдуллоҳ бошланғич диний таълимни онаси Пошшахон ойимдан олади. Сўнгра Пошшахон ойи уни ўша даврнинг машҳур мударриси ва ҳофизи Қуръони Абдурахмон (1894-1966) қорига шогирд қилиб беради. Ёшгина Сайдуллоҳ устозидан ихлос билан Қуръондан таълим олиб, ёш йигитлик давридаёқ ҳофизи Қуръон бўлиб етишади. Маълум вақтдан кейин эса Қуръони Каримнинг такрорини Абдулғофур (1872-1949) қори домлада мустаҳкамлайди.

Кейинчалик ўзини илмга бағишлаган Сайдуллоҳ қори тафсир, фикҳ, ақоид, араб ва форс тилларининг сарфу наҳви ва дин тарихи каби илмларни Мир Усмон (1874-1967) қори ва Кароматхон (1894-1984) эшон домлалардан мукамал ўзлаштириб, етук мулла ва ҳофизи Қуръон бўлиб етишади.

Сайдуллоҳ қорининг ҳаётлари асосан дин қаттиқ таъқиб остига олинган, диндорлар эса қатағон ва қувғин қилинган шўролар тузуми даврида ўтди. Бироқ шунга қарамай, Сайдуллоҳ қори маҳаллаларидаги қўни-қўшни, ёру биродарларига зиё, маърифат улашиб, Қуръони Каримдан сабоқ берар, шунингдек, Рамазон ойларида «Шайх эшон» масжидида ҳамда хонадонларида хатми Қуръонларда имомликка ўтиб бериб, ёши улур азизларимизнинг дуоларини олган эканлар.

Ўғиллари Убайдуллоҳ ака оталари Сайдуллоҳ қоридан эшитганларини шундай хотирлайдилар: «Отам раҳматли Рамазон ойига алоҳида тайёргарлик кўрар эдилар. Кунлардан бир куни рўзанинг бошларида (ҳозирги «Чорсу» меҳмонхонасининг атрофида жойлашган) «Катта эшон» номли масжидда хатми Қуръон бўлаётган экан. Устозлари ёш ва ўспирин Сайдуллоҳ қорини машҳур олим ва тариқат пешвоси Яҳёхон тўранинг назарларидан ўтказиш мақсадида уни ҳам олиб келади. У даврда масжидлар сони оз бўлганлиги, қорилар эса кўплигидан таровех намозининг хатмига қорилар икки ёки тўрт ракатдан ўтиб юришар экан. 30 пора Қуръони Каримни масжид ёки хонадонларда 3 ёки 5 кунда тугатиб, кейинги манзилларга ўтишар экан. Худди шу анъанага мувофиқ, устозлари Сайдуллоҳ қорини ҳам икки ракат намозга хатмонага ўтиб беришини сўрашибди. Қори домла хурсанд бўлганларидан икки ракат намозга ҳеч қаерда тўхтамай, Қуръони Каримдан 12 порасини ёддан ўқибдилар. Намозни тугатиб, кўп ўқиб юборганлари учун устозлардан танбеҳ олишдан қўрқиб, сакраб туриб, меҳроб ёнидаги дарчадан уйларига қочиб кетган эканлар».

Шаҳримиздан етишиб чиққан бир қанча уламолар Сайдуллоҳ қори домладан таълим олиб, бугунги кунда динимиз ривожига, юртимиз равақи ва халқимиз фаровонлигига ҳисса қўшиб келишмоқда. Уларнинг баъзиларини зикр қилиб ўтамин.

Маҳмудхон қори, Аъзамхон қори, Мусохон қори, Абдулатиф қори (Тўрақўғон кўчасидан) ва Абдураззоқ (моҳир хаттот) қори ва бошқалар.

Шогирдлари Абдулатиф ака устоз Сайдуллоҳ қори домлани шундай эслайдилар: «Устозим Сайдуллоҳ қори домла Қуръон билан ҳулқланган,

тақводор, самимий ва очик кўнгил, ёшу қарини бир хилда «сиз» деб мурожаат қиладиган ҳалим киши эдилар. Сайдуллоҳ қори Қуръони Каримнинг ҳифзини шу даражада мустаҳкам қилганларидан, Рамазон ойларида хатмоналарда адашмасдан, бир ўзлари хатмга ўтиб берган эканлар. Сайдуллоҳ қори домла биз шогирдларга илм олишдаги риёзатларини кўп айтардилар. Шулардан Қуръони Каримнинг ҳифзини асосан «Мавлавий» мақбараларида чилла ўтириб мустаҳкамлаганлари шунингдек, уйда бўлган вақтларида уйқуни қочириш мақсадида қиш ойларида оёқларини муздек сувга солиб, Қуръон мутолаа қилганлари тўғрисида кўп бора айтиб берардилар».

Сайдуллоҳ қори домла 1994 йили 18 апрель куни оламдан ўтдилар. Жанозаларини, васиятларига мувофиқ, Исҳоқ махдум домла ўқидилар. Жанозадан сўнг шаҳарнинг катта қабристонини «Мавлавий» мазорига дафн қилинди.

Сайдуллоҳ қори домланинг оилалари ва фарзандлари тўғрисида қисқача тўхталиб ўтамиз. Сайдуллоҳ қори домла Ботирхон эшон қизи Хон пошшахон (1923-2005) ойим билан турмуш қурганлар. Бу бахтли оиланинг 5 нафар ўғил, 3 нафар қиз фарзандлари бор.

Фарзандлари Ҳабибуллоҳон (1940-2011), Абдулҳамид (1947), Абдуллоҳон (1962-2007), Убайдуллоҳон (1952), Анасхон (1956-1995)[\[1\]](#).

Ҳозирги кунда ҳазрат Сайдуллоҳ қорининг 5 нафар набиралари ҳофизи Қуръонлар сулоласининг давомчилари бўлиб, динимизнинг ривожига ҳисса қўшиб келишмоқда.

Мустақил тадқиқотчи Акрам Шарипов

—
[1] Ушбу маълумотлар ҳофизи Қуръон Сайдуллоҳ қори авлодларининг шахсий архивидан олинди.
—
—
—